

zcu dem fure lieffe vnde getruwelichen erbeite vnde besehen wurde, dem sal der rat IIII nuwe gr. geben.

Item eß sal nymand in der stat reißholz an grossen huffen by sich in sinem huße ader hoffe vnde ouch fymen noch strohuffen haben legen, vnde also uffte eyner daz tut vnde irfunden wirdet, sal deme rate XX nuwe gr. zcu busse vorfallen sin vnd ane bethe geben. Item Welch burger itzunt uff dem marckte adir in den gassen gestrauwet ader susst mist uor syner thore legende hat, als schire denne zcu wetir tagen kommet, so daz iß tawig wirdet, der sal denn mist bynnen XIII tagen weg schicken vnde furen by eyner bussen XX nuwe gr. vnleßelich zcu geben. Item es sal auch hinforder keyner vnser burger wer der sie uff deme marckte ader yn denn gassen strauwen keynen mist, ouch uß synem hoffe uf die gassen tragen ader tragen lassen, er wulle denne uon stunt weg schicken, vnde welcher denn mist also ußtreit vnde bynnen sonnen schyn nicht weg schicket, der sal dem rate, also offte er daz tut vnde besehen wirdet, ane uorbete vnde vnleßelichen X nuwe gr. geben. Item es sal auch nymant hußkerich adir abereig uß synem huße tragen uff denn marckt adir in die gassen bye der gnanten busse X gr. Item so sal auch nymant, der brauwehußer hat, stelstro hoppe adir andir dinge uff die gasse, sundern in synen hoff lassen tragen adir schutten by der gnanten busse. Item es sal auch hinforder mehir kein kolgertener vnde vorsteter, die do uff dem marckte phlegen veile zcu haben krut czwippoln keße eyre putter huner vnde andir ding, domitte sie sich pflegen zcu setzen, kein stro adir haw mit sich brengen, daruff zcu setzen, douon der marckt adir gassen bestroet adir bemist wurden, vnde wer stro mit sich brenget vnd besehn wirdet, den adir die sullen des rats dyner vnde marcktmeister vor eyn schilling phennige phenden vnd die vnleßlich geben. Item eß sal ouch hinforder keyn furman adir gebur, der holcz getreide addir [ander] ding zcu marckte brenget vnde veile hat, sine pherde uff dem marckte adir yn den gassen nicht futern, sundern in syner herberge, vnde wer do besehen [wirt], daz er uff der gassen futtert, den addir die sullen die marcktmeister uor eyn schilling phenden.

Nach dem Stadtbuch fol. 48<sup>b</sup> im Rathsarchiv zu Leipzig.

## No. 229. Zwischen 1444 und 1446.

*Der Rath legt die Streitigkeiten zwischen den Schustern und den Altreussen bei.*

Wir ratmanne vnde gesworne czu Lipezk bekennen offintlichen vor idermeniclichen. Als die ersamen Benedictus Arnolt der nuwen schustermeister mit synen gewercken uff eyne vnde B. meister der altrusen mit iren gewercken vnser mitbürger uff die andere siete vndir sich etzliche schelniß ufflouffte vnde czweytracht von ires hantwerckis wegin bißher gehat haben, uff vns willi[cli]chen mit wolbedachtem mute, sie uff beiden teilen solliche czweytracht zcuentscheiden, gegangen sint vnde wir sie der<sup>1)</sup> alle mit rate vnser drier rete gutlichin vnd fruntlichen bericht

1) Or. die.